

By : TAN SRI MOHD. SIDEK BIN HJ. HASSAN
KETUA SETIAUSAHA NEGARA
Venue : PUSAT KONVENSYEN ANTARABANGSA PUTRAJAYA
Date : 31/03/2009
Title : MAJLIS PELANCARAN DASAR PENGURUSAN ASET KERAJAAN

Bismillahir rahmanir rahim

Assalamu'alaikum warahmatullahi wabarakatuh dan salam sejahtera.

Yang Amat Berhormat Dato' Seri Abdullah Haji Ahmad Badawi
Perdana Menteri Malaysia

Yang Berhormat Dato' Sri Ir. Mohd Zin Mohamed
Menteri Kerja Raya

Yang Berhormat Menteri

Yang Berhormat Timbalan Menteri

Yang Berbahagia Tan Sri-Tan Sri, Dato' Seri-Dato' Seri, Dato'-Dato', Datin-Datin

Dif-dif kehormat, wakil-wakil media, tuan-tuan dan puan-puan yang saya hormati sekalian.

Alhamdulillah, bersyukur kita ke hadrat Allah SWT kerana dengan limpah rahmat dan izin Nya, dapat kita bersama-sama berkumpul dalam Majlis Pelancaran Dasar Pengurusan Aset Kerajaan pada hari ini. Ini adalah merupakan detik yang bersejarah bagi Negara, bahkan tidak keterlaluan jika saya katakan, dasar yang akan dilancarkan oleh Yang Amat Berhormat Perdana Menteri sebentar nanti akan mencetus satu revolusi budaya dan minda dalam mengurus harta dan aset Kerajaan.

2. Saya mengambil kesempatan ini untuk merakamkan setinggi-tinggi penghargaan dan terima kasih kepada Yang Amat Berhormat Perdana Menteri atas keprihatinan yang ditunjukkan berhubung aspek pengurusan aset Kerajaan dan menjadi pendorong kepada usaha pewujudan Dasar ini. Sesungguhnya kami amat berbesar hati dengan pendekatan dan keprihatinan yang ditunjukkan oleh Yang Amat Dato' Seri selama ini.

3. Ucapan terima kasih dan tahniah juga saya tujukan kepada semua kementerian dan agensi kerajaan atas kerjasama serta kesungguhan demi memastikan Dasar yang komprehensif dan bersepadu ini, berjaya dirumuskan. Syabas saya ucapkan kepada Jabatan Kerja Raya yang telah bekerja keras, menggembleng tenaga dan idea demi memastikan Dasar ini disiapkan menepati jangka masa yang telah ditetapkan.

Hadirin yang dihormati sekalian,

4. Dasar Pengurusan Aset Kerajaan adalah sejajar dengan kehendak Kerajaan untuk menyemai nilai, mentaliti dan budaya penyenggaraan kelas pertama bagi mengiringi pembangunan fizikal kelas pertama. Dasar ini adalah merupakan susulan dari beberapa resolusi yang telah dibuat semasa berlangsungnya Konvensyen Pengurusan Aset dan Fasiliti Negara atau NAFAM 2007 anjuran bersama Jabatan Kerja Raya dan Advanced Maintenance Precision Management Sdn Bhd pada 13 dan 14 Ogos 2007. Saya masih ingat bahawa Y.A.B. Perdana Menteri, setelah merasmikan pembukaan NAFAM 2007 pada pagi 13 Ogos 2007 membuat lawatan ke negara Brunei Darussalam dan balik pula pada petang 14 Ogos 2007 untuk merasmikan penutupan NAFAM 2007. Ini jelas menunjukkan pentingnya isu pengurusan aset kerajaan kepada Y.A.B. Perdana Menteri, dan ia harus dihayati oleh semua penjawat awam.

5. Konvensyen NAFAM 2007, yang disertai lebih 1,500 peserta mewakili pelbagai kementerian, agensi kerajaan, kerajaan negeri, pihak berkuasa tempatan, badan profesional dan golongan akademik, telah

menghimpunkan pakar-pakar industri dari dalam dan luar negara untuk membincangkan cara dan kaedah terbaik mengurus fasiliti dan aset negara secara lebih berkesan.

6. Dari sesi percambahan tersebut beberapa resolusi telah digariskan, iaitu:

(i) Mewujudkan satu rangka pengurusan aset dan fasiliti yang menyeluruh, yang menuntut pembabitan secara langsung oleh semua pihak berkepentingan;

(ii) Menambah baik proses perolehan aset;

(iii) Mewujudkan satu sistem pemantauan dan kawalan terhadap keberkesanan aset;

(iv) Mewujudkan satu model kewangan dalam pengurusan aset; DAN

(v) Mewujudkan satu program pembangunan yang menyeluruh dan berkesan.

7. Bertitik tolak dari NAFAM 2007, satu Jawatankuasa Pengurusan Aset Kerajaan telah diwujudkan pada September 2007, dengan JKR selaku Urus setia, bertujuan memberi tumpuan kepada usaha-usaha meningkatkan mutu pengurusan aset secara strategik dan berkesan untuk diguna pakai oleh semua agensi Kerajaan.

8. Hasil input dan kerjasama daripada wakil pelbagai Kementerian dan Institusi Pengajian Tinggi, serta pakar dari industri pengurusan aset dan fasiliti, Jawatankuasa telah berjaya merumuskan:

(i) Dasar yang menggariskan hala tuju dan pelaksanaan pengurusan aset Kerajaan; DAN

(ii) Manual Pengurusan Aset Menyeluruh yang merupakan garis panduan untuk menjelaskan konsep Pengurusan Aset Menyeluruh, bermula dari proses perancangan, pewujudan, penggunaan serta pelupusan aset, selain tanggungjawab dan amalan urus tadbir yang baik.

9. Dasar yang akan dilancarkan oleh Y.A.B. Perdana Menteri sebentar nanti akan menjadi panduan untuk diguna pakai oleh semua agensi Kerajaan, menerusi pendekatan Pengurusan Aset Menyeluruh supaya nilai penggunaan dan keberkesanan aset mencapai tahap optimum. Adalah menjadi tanggungjawab kita bersama, khasnya penjawat-penjawat awam, untuk melaksanakannya seiring dengan tema Majlis Pelancaran pada hari ini, iaitu, "Aset Negara, Amanah dan Tanggungjawab Bersama".

Sekian,

Wabillahittaufig walhidayah

Wassalamualaikum warahmatullahi wabarakatuh.